


39

29

HARVARD COLLEGE LIBRARY
FROM THE
HARVARD-YENCHING
INSTITUTE
DEC 28 1929

~~Ch L 9301.8244~~

~~Ch B 9297.8244~~
327



錦繡萬花谷別集卷之二十三

夢寐

夢遊華胥國 列子黃帝晝寢夢遊華胥氏之國既覺怡然自得天下大治幾若華胥之國

夢帶印綬登樓 後漢張奐為武威太守其妻懷孕夢帶

負印綬登樓而歌訊之占者曰必將生男復臨茲邦

此樓既而生子猛以建安中為武威太守殺刺史邯鄲商州兵圍之急猛耻見擒乃登樓自燒而死卒如占云

夢書白駒字 唐杜牧夢人告曰爾應名畢復夢書皎皎

白駒字俄而炊餽裂牧曰不祥也乃自為墓誌悉取所為文章焚之

枕中記 陳翰異聞集載開元中道者呂翁經邯鄲道上

哈佛大學哈佛燕京
圖書館珍藏印

邱舍中有邑少年盧生同止于邱主人方蒸黃糧共待其熟盧不覺長嘆翁問之具言生世困厄翁取囊中枕以授盧曰枕此當榮適如願生俛首但記身入枕穴中遂至其家未幾登高第歷臺閣出入將相五十年子孫皆列顯仕榮盛無比上疏曰臣年逾八十位列三台空負深恩未辭聖代其夕卒盧生欠伸而寤呂翁在旁黃梁尚未熟生謝曰此先生所以窒吾欲也敢不受教再拜而去

南柯太守 異聞集載淳于棼家廣陵宅南有古槐生豪飲其下因醉致疾二友扶生歸卧東廡夢二紫衣使者曰槐安國王奉邀生隨二使者上車指古槐入一穴中大城朱門題曰大槐安國有一騎傳呼曰附馬遠降引

生升廣殿見一人衣素練服簪朱華冠令生拜王王曰前奉賢尊命許令女瑤芳奉事君子有數才仙姬奏樂執燭引至一門號修儀宮一女子號金枝公主儼若神仙交懽成禮情義日洽王曰吾南柯郡政事不理屈卿為守勅有司出金玉錦繡僕妾車馬施列廣衢餞公主行累日達郡下車省風俗察疾苦郡中大理凡二十載百姓立生祠王賜爵錫邑位居台輔生五男二女榮盛莫比公主遇疾而薨生護喪歸葬於盤龍岡生以貴戚戚福日盛有人上表云玄象謫見國有大恐都邑遷徙宗廟崩壞事在蕭牆時議以生僭侈之應王因命生曰卿可暫歸本里一見親族諸孫留此無以為念復令二使者送出穴遂寤斜日未隱西垣餘尊尚留東牖因與

二客尋古槐下穴洞然朗朗可容一榻上有土壤爲城郭臺殿之狀有蟻數斛二大蟻素翼朱首乃槐安國王也又窮一穴直上南枝羣蟻亦處其中卽南柯郡也又一穴盤屈若龍蛇狀有小墳高尺餘卽盤龍岡也生追想感嘆遽遣掩塞是夕風雨暴發旦視其穴遂失羣蟻莫知所之所謂國有大恐都邑遷徙此其驗也

靈芝宮

東軒雜錄云王安國字平甫熙寧六年冬直宿

崇文院夢有邀至海上宮殿甚盛笙簫大作題曰靈芝宮有人隔水止之曰時未至且令去恍然夢覺禁中已鳴鐘矣平甫爲詩曰萬頃波濤木葉飛笙簫宮殿號靈芝揮毫不似人間世長樂鐘鳴夢覺時後四年平甫卒又三年太常魯阜夢與平甫會因吊之曰平甫不幸早

世今所處良苦如何但見平甫笑而不止傍一人曰平甫已列仙官矣其樂非塵世比也阜喜而寤

夢棺夢穢 晉殷浩字深源或問曰將蒞官而夢棺將得財而夢糞何也浩曰官本臭腐故將官而夢棺錢本糞土故將得錢而夢穢時以爲名言

詩 夢裏行人事覺來思夢前不知今亦夢更把夢來原

○夢裏常言夢如今覺後知不知今亦夢更有覺來時

並邵堯夫 歲逢困敦斗申指辰次庚辰漏傳子夢出城闥登

古原草木縈天帶流水千夫荷鍤開久殯前有一人狀

瓌偉素冠長跪烝酒殺云是劉郎字全美馬鳴車響斷

還續人境晦明秋色裏旣寤茫然失所遭河轉星翻汗

如洗世傳夢凶常得吉神物戲人良有旨全美聲名海

縣聞閉又當開乃其理娟娟二十四橋月月下吹簫聊
爾耳洗眼看君先一鳴九萬扶搖從此始秦少游記夢
答劉全美

吉兆

閣中有麻生紀異錄鄭珏李愚同為學士鄭閣中一麻
生李曰承旨入相矣余願當制得盡荒虛時亢旱甚久
麻獨茂盛霜降成實即白麻也是夜制出鄭果登庸
白沙相公同前李愚所居暴雨一庭俱為白沙及薨得
地於白沙里時號白沙相公

打毬一棒為猛入洛中記莊宗詔孟知祥鎮成都先是
蜀人打毬一棒便入湖子者為猛入語訛為孟入得蔭
一籌後孟氏盡得兩蜀至子昶一籌者果一子也

刺史坐法曹廳定命錄陸景融為新鄭令有客曰公三

十年後為此州刺史所坐當於法曹廳坐後果為刺史
所坐廳乃法曹舊廳往年刺史嫌州宅偏仄遂通法曹
廳為廳

凶兆

北斗君主簿幽明錄許攸夢烏衣吏奉漆案上有六封
文書拜跪曰府君當為北斗君陳康為主簿既覺康忽
來謁攸曰我作道師死不過作社公今得北斗主簿余
為忝矣明年同日而死

外閣有著屐聲同前王輔嗣註易笑鄭玄云老奴甚無
意夜久忽聞外閣有著屐聲須臾自入自云是鄭玄曰
君少年何以穿鑿文句妄譏老子言訖而去嗣輔暴卒
朝霞詩紀異錄趙霖朝霞詩云不因紅日照長作白雲

飛然太陽一照不久之象後及第升朝賜緋而卒

天漢一聯洛中紀異王德輿有詩名嘗有一聯云天漢尚不正河源爭得清崔胤相國聞之大不悅竟流落而

死

喪葬

夢覺奔喪後漢范式字巨卿與汝南張劭為友劭字元伯式仕為郡功曹元伯寢疾卒式忽夢見元伯玄冕垂纓屣履而呼曰巨卿吾以某日死當以某時葬子未我忘豈能相及式恍然覺寤悲嘆泣下具告太守請往奔喪太守許之式便服朋友之服投其葬日馳往赴之式未到而喪已發引既至壙將窆而柩不肯進其母撫之曰元伯豈有望耶遂停柩移時乃見素車白馬號哭而

來母望之曰是必巨卿也巨卿既至叩喪言曰行矣元伯死生異路未從此辭因執紼而引柩於是乃前式遂留冢為脩墳樹然後乃去

得馬與被

後漢王恂

音純

嘗詣京師於空舍中見一書生

疾困謂恂曰我當到洛陽而被病命在須臾腰下有金十筋願以相贈死後乞藏骸骨未及問姓名而命絕恂卽鬻一筋營其殯葬餘金悉置棺下人無知者後歸數年縣署恂大度亭長初到之日有馬馳入亭中而止其日大風飄一繡被墮恂前言之於縣縣以歸恂後乘馬到雒縣馬奔走牽恂入他舍主人見之問恂所由得馬恂具說其狀并及繡被主人悵然良久乃曰被與馬俱亡卿何陰德致此恂自念有葬書生事因說之并道書

生形貌及埋金之事主人大驚愕曰是我子也姓金名彥前往京師不知所在何意卿乃葬之大恩久不報天以此章卿德耳

李德裕見夢唐李德裕貶崖州司戶明年卒見夢令狐綯曰公辛亥哀我使得歸葬綯懼曰衛公精爽可畏不言禍將及白于帝得以喪還

羸葬漢楊王孫學黃老之術及病且終先令其子曰吾欲羸葬以反吾必亡易吾意死則為布囊盛尸入地七尺既下從足引脫其囊以身親土

書生指葬地後漢袁安父卒母使安訪求葬地道逢三書生問安何之安為言其故生乃指一處云葬此地當世為上公須臾不見安異之遂葬其地故累世隆盛焉

種瓜得也葬母幽冥錄孫鍾少時家貧種瓜瓜熟有人來乞瓜鍾引入菴中設瓜及飯飯訖謂鍾曰蒙君厚惠今示子葬地欲得世世封侯欲為數代天子又曰我司命也君下山百步勿反顧鍾下六十來步回看並為白鶴飛去鍾遂於此葬母冢上有氣屬天鍾後生堅堅生權權生亮及休權孫和生皓為晉所滅降為歸命侯

織女助償債錢漢董永少失母養父家貧傭力農月以小車推父置田頭陰樹下而營農作父死後就主人償錢一萬約賣身為奴遂得錢葬父還於路忽遇一婦人姿容端美求為求作妻永乃俱詣主人令求妻織縑三百匹放汝夫妻乃當機織一月而畢主人怪其速遂放之相隨至舊相遇處輒辭求曰我天之織女也緣君至

孝天帝令助君償債言訖凌空而去

天子之宮夾我墓史記秦武王以樗里子甘茂為左右

丞相疾卒葬渭南章臺東曰後百歲當有天子之宮夾

我墓至漢興長樂宮在其東未央宮在其西

白楊杜壯遊詩四郊多白楊註云白楊墳上之草也又

陶潛挽歌云荒草何茫茫白楊亦蕭蕭

葬用紙錢唐王璵擢太常博士為祠祭使專以祠解中

帝意有所襮被大抵類巫覡漢以來葬皆有瘞錢後世

里俗稍以紙寓錢為鬼事至是璵及用之覡胡狄反男
日巫女日覡

帝成白玉樓李商隱李賀小傳長吉將死時忽晝見一

緋衣人駕赤蚪持一版書若太古篆或霹靂石文者云

召長吉長吉了不能讀歛下榻叩頭言阿彌老且病不

願去緋衣人笑曰帝成白玉樓立召君為記天上差樂
不苦也長吉獨泣邊人盡見之長吉氣絕常所居窓中
勃勃有煙氣聞行車嚙管之聲太夫人急止人哭待之
如炊五斗黍許時長吉竟死

寫堯典置棺前後漢周磐建光初歲朝令其二子曰吾

日者夢見先師東里先生與我講于陰堂之奧既而長

嘆豈吾齒之盡乎若命終之日寫堯典一篇以置棺前

示不忘聖道其月望日無病忽終學者以為知命

抱母棺號哭後漢蔡順母終未及葬里中火將逼其舍

順抱伏棺柩號哭火遂越燒他室

積善之墓唐張說字道濟或字說之嘗自為其父碑帝

為書其額曰積善之墓

重名不重官 裴敬作李翰林墓碑云貴盡皆然名存則難故子重名不重官

以天地為棺槨 莊子列御寇篇莊子將死弟子欲厚葬之莊子曰吾以天地為棺槨以日月為連璧星辰為珠璣萬物為齋送吾葬具豈不備邪何以加此弟子曰吾恐烏鳶之食夫子也莊子曰在上為烏鳶食在下為蟻食奪彼與此何其偏也

置餘金棺下 唐李勉字玄卿少貧俠客梁宋與諸生共逆旅諸生疾且死出白金曰左右無知者幸君以此為我葬餘則君自取之勉許諾既葬置餘金棺下後其家謁勉共啓墓出金付之

感風木 文選梁武帝孝思賦念過隙之倏忽悲逝川之不停踐霜露之悽愴懷燧穀而涕零仲由念枯魚而水慕虞舜感風木之長悲

哀挽

老父哭龔勝 漢龔勝死有老父來弔哭甚哀既而曰嗟乎薰以香自燒膏以明自消龔生竟天天年非吾徒也遂趨而出莫知其誰

埋王重泉 山巨源哭嵇康曰中散死埋王重泉沉珠滄海不重見斯人矣

野哭 諸葛亮亡人皆野哭

薤露蒿里歌 文選挽歌序云漢高召田橫至尸鄉自殺從者不敢哭而不勝哀故為悲歌以寄其情後續之為薤露蒿里歌以送喪也至李延年分為二等薤露送王

公貴人蒿里送士大夫庶人使挽柩者歌之故呼為挽歌

漳濱蒿里 杜哭李尚書詩漳濱與蒿里逝水竟同年詩

云劉公幹云余嬰沈痼疾竄身清漳濱

坐中流淚 續漢書曰大將軍梁商三月上巳日會洛水

倡樂必樂極約於薤露之歌坐中流淚

錦繡萬花谷別集卷之二十三

錦繡萬花谷別集卷之二十四

宮殿

阿房宮

房音旁

史記始皇作前殿阿房東西五百步南北

五十丈上可以坐萬人下可以建五丈旗又杜牧阿房

宮賦蜀山兀阿房出覆壓三百餘里隔離天日驪山北

構而西折直走咸陽三川溶溶流入宮墻五步一樓十

步一閣廊腰縵迴簷牙高啄

鳳閣虎圈

漢太初元年作建章宮度為千門萬戶東則

鳳閣西則虎圈北治大池漸臺名曰太液南有玉堂輦

道相屬焉

度子各反漸子廉反

珠殿 李太白宮中行樂詞玉樓巢翡翠珠殿鎖鴛鴦選

妓隨雕輦徵歌出洞房宮中誰第一飛燕在昭陽

柳蒲爲誰綠 杜哀江頭詩少陵野老吞聲哭春日潛行
曲江曲江頭宮殿鎖千門細柳新蒲爲誰綠

詩梧桐葉生綠陰陰長聲短聲弄春禽曉煙入窓簾
重日影未透春沉沉風吹細管無尋處霧隔樓臺花隔
霧闌干屈曲閣道通漢宮十里皆相似鳴車玲瓏下星
橋扶上雲端望赭袍霹靂一聲宮仗過唯見月明金殿
高右沈存中漢宮詩

宅舍

木床葦席 杜寄舍弟詩庾信羅含俱有宅黃註云庾信
因侯景之亂自建康遁歸江陵居宋玉故宅宅在城北
三里又師註云羅含爲桓温別駕以廨舍喧擾於江陵
城西三里小洲上立茅屋伐木爲床織葦爲席而居布

衣蔬食晏如也後安成王在鎮以其宅借錄事劉朗之
見一丈夫衣冠甚偉朗之驚問忽然失之人謂含有神
佳宅直二百萬 唐馬周爲御史時遣人以圖購宅衆以
其與書生素無貲皆竊笑他日白有佳宅直二百萬周
遽以聞詔有司給直并賜奴婢什物由是人乃悟

燕雀賀淮南子大厦成而燕雀知賀

萬間庇寒士 杜茅屋詩安得廣厦千萬間大庇天下寒
士俱歡顏風雨不動安如山嗚呼何時眼前突兀見此
屋吾廬獨破受凍死亦足

夏屋併懔 揚吾子篇震風凌雨然後知夏屋之併懔也
治第東都 裴度治第東都沼石林叢岑繞幽勝午橋作
別墅具燠館涼臺號綠野堂度野服與白居易劉禹錫

文章把酒

桑樞瓦牖莊子讓王篇原憲居魯環堵之室桑樞瓦牖

蝸牛廬魏志胡昭傳註隱者焦光作圓舍形如蝸牛謂

之蝸牛廬

辛勤三十年韓文辛勤三十年以有此屋廬

敝廬避風雨文中子有先人之敝廬在可以避風雨

階庭

芝蘭玉樹晉書謝元為叔父安所器重安常戒約子弟

元答曰譬如芝蘭玉樹欲使其生於階庭耳安大悅

金阨文選西京賦金阨玉階彤庭輝輝

左城文選班固西都賦左城右平重軒三階註城階級

也

文陛梅福傳願一登文石之陛踐赤墀之塗又沈休文

碑升降文陛註云以文石砌之

三等司馬遷傳堯舜堂高九尺土階三等

種棠潘岳詩前庭種沙棠

楸生韓文庭楸止五株共生百步間

門牆

通德門後漢鄭玄字康成孔融造門告高密縣曰昔于公僅有一節猶侈其門閭矧鄭公之德而無駟牡之路可廣開門衢令容高車號為通德門

雷門漢王尊曰毋持布鼓過雷門註云雷門會稽城門也

有大鼓越擊此鼓聲聞洛陽布鼓以布為鼓

剝啄韓文剝剝啄啄有客至門我不出應客去而嗔

掃軌 後漢杜密傳同郡劉勝自蜀郡告歸鄉里閉門掃軌無所不及

無丹青之彩 劉向新序諸侯垣牆無丹青之彩

蔽隱形容 釋名墉容也所以蔽隱形容

門銘 李尤門銘之設張為宅表會

多車轍 陳平家貧以席為門外多長者車轍

登龍 後漢李膺以聲名自高士被其容接者名登龍門

無卿相輿 左太冲詩寂寂揚子宅門無卿相輿

羅雀 前後翟公為廷尉賓客填門及廢門外可設雀羅

金馬 史金馬門者署門旁有銅馬故謂之金馬門

樓閣

蜃氣 漢書曰海旁蜃氣象樓臺廣稊氣成宮闕

井幹樓 漢宮殿疏云井幹樓積木而高為樓若井幹之形也井幹者井上木欄也其形或四角或八角張衡西京賦云井幹疊而百層

乘月清嘯 晉劉琨在晉陽嘗為胡騎所圍數重窘迫無計琨乃乘月登樓清嘯賊聞之皆凄然長嘆中夜奏胡笳賊又流涕有懷土之切向曉復吹之賊並棄圍而去

五層 幽明錄鄴城五層樓

八詠 沈休文有八詠樓

候神人 史黃帝為樓候神人

芳塵 拾遺記石虎起樓四十丈以雜寶異香為屑風作則揚之名芳塵

吹簫感鳳 列仙傳秦穆公女登樓吹簫感鳳來

臨春南史陳後主起臨春結綺望春三閣皆以沉檀香木爲之

詩未登快閣心先快紅日半簷秋雨晴宇宙無邊萬山立雲煙不動八窓明飛來一鶴天相近過盡千帆江自橫借問金華老仙伯幾人無忝入詩盟戴石屏登快閣和山谷留題之韻鄂州州前山頂頭上有縹緲百尺樓大開牕戶納宇宙高插闌干侵斗牛我疑脚踏蒼龍背下瞰八荒無內外江渚鱗差十萬家淮楚荆湖一都會西風吹盡庾公塵秋影涵空動碧雲欲識古今興廢事細看文簡李公文石屏鄂州南樓詩北固樓前一笛風碧雲飛盡建康宮江南二月多芳草春在濛濛細雨中僧仲殊飛宇橫天末回欄下水濱卷簾千嶂月凭檻一溪春沈存中疊嶂樓秋光着地清

如瀉拂座輕雲行玉馬晴鏡影上青冥風動波光搖碧瓦凝嵐欲開天映水重重翠巘冰紈裏曲垣秀拱繚層城斗上蒼崖見雲起春泉竹徑煙曛曠盡撓落處江如空晴天遠樹礙孤嶼清轉唳管低霜鴻人散日斜歸鳥息葉底秋聲含暮色半天簾幙煙霧中海雲不動蓬山碧沈存中宣城雙溪閣詩雙峯直上與天參僧共白雲棲一菴今古詩人吟不盡好山無數滿江南石屏申子山翠微閣

亭臺

沉香為亭唐淮南壯王道元六世孫漢字南紀累遷左拾遺敬宗侈宮室舶賈獻沉香亭材帝受之漢諫曰以沉香爲亭何異瑤臺瓊室乎

孟亭唐孟浩然王維過郢州畫浩然像於刺史亭因曰

浩然亭咸通中鄭誠謂賢者名不可斥更曰孟亭

勞勞亭李白勞勞亭詩天下傷心處勞勞送客亭春風

知別苦不遣柳條青

趙公亭李白趙公西候新亭頌耽耽高亭趙公所營如

鰲背突兀於太清如鵬翼開張而欲行

寒亭雲齋廣錄云荆門軍王泉山寒亭過客多題詩獨

一篇云朔風凜凜雪漫漫未是寒亭分外寒六月火雲

天不雨請君來此凭闌干

神明臺師古曰漢宮殿疏云神明臺高五十丈上有九

室恒置九天道士百人

登單于臺漢武帝紀登單于臺勒兵十八萬騎旌旗徑

千餘里

精思亭唐李德裕私第有精思亭

戲馬臺項羽築戲馬臺又南齊書宋武帝為宋公子時

在彭城九月九日遊戲馬臺今相承以為故事

詩倚遍南樓更鶴樓小亭瀟洒更宜秋接天煙浪來三

峽隔岸樓臺又一州豪傑不生機事息古今無盡大江

流凭闌日暮懷鄉國崔顥詩中舊日愁戴石屏鄂尋幽

覽勝老猶勤但覺吟身瘦幾分淨洗一生塵土眼細看

七十二峯雲石屏嶽市勝亭下新池好亭中古意存欲

通溪上路遂闌竹邊門自昔好賓客相傳到子孫會看

司命鶴時到種瓜園石屏題黃仲登臨舒老眼弔古得

淒涼故國自龍虎高臺無鳳凰浮雲多改變喬木見興

亡往事渾休問鍾山又夕陽石屏鳳皇臺

池塘

曲江池 康駢劇談錄曲江池本秦隄州開元中疏鑿為妙境花卉周環煙木明媚都人遊玩盛於中和節江側菰蒲蔥翠柳陰四合碧波紅蕖湛然可愛

太液池 前漢郊祀志武帝甘泉作建章宮其北治大池名曰太液池中有蓬萊方丈海中神山

昆明池 潘岳關中記漢武帝習水戰作昆明池又西征賦昆明池湯湯澼澼滉滉漾瀾漫

衝破琉璃 王筠詩扁舟泛西池衝破碧琉璃

生春草 謝靈運思詩不就忽夢弟惠連即得池塘生春草之句大以為工

苑囿

宜春苑 西京雜記云京城龍華寺南有流水屈曲謂之

曲江在秦時為宜春苑漢時為樂遊苑

令麋鹿觸冠 史記秦始皇欲大苑囿優旃曰善多縱禽

獸於其中冠從東方來令麋鹿觸之足矣始皇輟止二世立又欲漆其城旃曰佳哉漆城蕩蕩冠來不能上二世笑而止

天子賣果蔬 唐蘇良嗣傳裴匪躬案諸苑建言鬻果蔬

儲利蘇公止良嗣曰公儀休一諸侯相拔葵去織未聞天子賣果蔬與人爭利遂止

漢晉苑 徐堅初學記漢有上林樂遊博望黃山後漢有

鴻德畢主靈昆廣成諸苑晉有平樂鹿子桑梓諸苑

博望 漢書戾太子既冠就宮為立博望苑使通賓客

蘊新蒸 風俗通曰苑蘊也言薪蒸所蘊積也

養百獸 漢舊儀苑中養百獸祠用鹿麋

獵禽獸 漢舊儀天子秋冬射獵苑中取禽獸

漢名苑 漢書其名苑有天苑禁苑上苑

植木築土 說文植木為苑築土為囿又云草木為苑禽

獸為囿

烏栖 張協七命囿栖三足之鳥

域禽獸 詩疏云囿者築墻為界域故云域禽獸

原囿具囿 左僖三十三年鄭之有原囿猶秦之有具囿

也

井

投轄 前漢陳遵每大飲賓客滿堂輒取客車轄投井雖

有急終不得去

拜井 耿恭以疏勒城傍有澗水可固引兵據之匈奴擁

絕澗水恭於城中穿井十五丈不得水乃向井再拜為

吏士禱有頃水奔

不瀉剗 蘇氏演義小說載金陵記曰南計吏止于傳舍

間及將就路以馬殘草瀉於井中而去謂無再過之期

不久復由此飲於井遂為昔時剗刺喉而死故後人戒

之曰千里井不瀉剗

木飲 酉陽雜俎云木飲州珠崖一州其地無泉民不作

井皆仰樹汁為用

無井國 酉陽雜俎云仍建國無井及河澗所有種植待

雨而生以紫鑛泥地承雨水用之穿井即若海水又鹹

土俗潮落之後半地爲池收魚以作食

半青半黃酉陽雜俎云石陽縣有井水半青半黃黃者如灰汁取作粥飲悉作金色氣甚芬馥

掘井得船酉陽雜俎云烏山下無水魏末有人掘井五丈得一石函函中得一龜大如馬蹄復掘三丈遇盤石下有水流洶洶然遂鑿石穿水北流甚駛俄有一船觸石而上匠人窺船上得一杉木板刻字曰吳赤烏二年八月十日武昌王子義之船

鑽羊史記孔子世家魯定公五年季桓子穿井得土在中石若羊仲尼曰土之怪鑽羊

素綆汲寒漿古詩後園鑿井銀作床金瓶素綆汲寒漿

桔槔說苑有丈夫負缶入井人教以重後輕前名曰桔槔丈夫曰機智之巧必有機心吾耻不爲

錦繡萬花谷別集卷之二十四

錦繡萬花谷別集卷之二十五

書篆

游雲驚龍 王羲之字逸少善隸書為古今之冠論者稱其筆勢以為飄若游雲矯若驚龍

草隸名家 唐裴行儉工草隸名家太宗嘗以絹素詔寫文選覽之秘愛其法賚物良厚所撰選譜草字雜體數萬言

明皇工八分 書苑云明皇好圖畫工八分張說為麗正殿學士獻詩明皇自於彩牋上八分書讚曰德重和鼎功逾濟川詞林秀發翰苑光鮮

百體中書篆隸 百體中有懸針書垂露書秦王破冢書金鵲書虎爪書倒薤書偃波書信幡書飛帛書縮書謬

篆書制書列書日書月書風書署書虫食葉書胡書蓬
書天竺書楷書橫芝英隸鐘隸鼓隸龍虎篆麒麟篆魚
篆虫篆鳥篆鼠篆牛書兔書草書龍草書狼書犬書雞
書震書反左書行狎書檝書藁書半草書出西陽雜
西域書有驢唇書蓮華書節分書大秦書馱乘書西域
書樹葉書起死書右旋書覆書天書龍書鳥音書等六
十四種

似鳥欲飛南史蕭引善書為當時所重梁宣帝嘗披奏
事指引署名曰此字筆趣翩翩似鳥之欲飛引謝曰此
乃陛下假其毛羽耳

臣無第二南史齊高帝善書篤好不已與王僧虔賭書
謂曰誰為第一對曰臣書第一陛下亦第一帝笑曰卿

可謂善自謀或云帝問我書何如卿對曰臣正書第一
草書第二陛下草書第二而正書第三臣無第三陛下
無第一帝大笑曰卿善為辭

筆殺中山兔李白草書行少年上人號懷素草書天下
稱獨步墨池飛出北溟魚筆鋒殺盡中山兔八月九月
天氣涼酒徒詞客滿高堂牋麻素絹排數箱宣州石硯
墨色光吾師醉後倚繩牀須臾掃盡數千張飄風驟雨
驚颯颯落花飛雪何茫茫起來向壁不停手一行數字
大如斗恍恍如聞神鬼驚時時只見龍蛇走

虞褚薛魏唐魏證子叔瑜善草隸以筆意傳其子華及
甥薛稷世稱善書者前有虞褚後有薛魏

竹書科斗字晉書汲郡不準不姓準發魏襄王墓或言

安釐王冢得竹書數十車皆科斗字及官收之文既殘
缺武帝以其書付秘書校掇篇第以今文寫之

竹簡科斗書 晉書有人於嵩高山下得竹簡一枚上兩
行科斗書莫有知者張華問束皙曰此漢明帝題節陵
中策也檢驗果然

聞鼓吹得筆法 唐張旭嗜酒每大醉狂呼走乃下筆或
以頭濡墨而書既醒自視以爲神旭自言始見公主擔
夫爭道又聞鼓吹得筆法意

畫

麒麟出壁 杜畫馬歌戲拈秃筆掃驊騮倏見麒麟出東
壁一匹斲草一匹嘶坐看千里當霜蹄當丁浪反

剪吳松半江水 杜畫山水圖歌馬得并州快剪刀剪取

吳松半江水蘇註云索靖見顧愷之畫欣然曰恨不帶
并州快剪刀來欲剪松江半幅紋練歸去又古詩云惜
君快剪刀輕絹剪波去

問畫難易 韓子曰客爲齊王畫者問畫孰難對曰狗馬
最難孰易曰鬼魅最易狗馬人所知也故難鬼魅無形
故易又後漢張衡圖緯疏云譬猶畫工惡圖犬馬而好
作鬼魅誠以實事難形而虛僞不窮也

十二峯飛入絲屏 李白觀元丹丘坐巫山屏風詩昔遊
三峽見巫山見畫巫山宛相似疑是天邊十二峯飛入
君家絲屏裏寒松蕭颯如有聲陽臺微茫如有情

輕雲蔽月 晉顧愷之善丹青謝安深重之欲圖殷仲堪
仲堪有目疾固辭愷之曰明府正爲眼耳若明點瞳子

飛白拂上如輕雲蔽月豈不美乎從之

舉手彈繩 吳錄曹不與畫屏風誤落筆點素就作繩孫
權以為生繩舉手彈之

烏駁犢牛 晉王獻之書扇筆誤落因畫作烏駁犢牛甚
妙

傳呼畫師 唐閻立本傳太宗與侍臣泛舟春苑池見異
鳥容與波上悅之召立本侔狀閣外傳呼畫師立本俯

伏池左研吮丹粉望坐者羞悵流汗

詩 海內文章非畫師能回筆力作枯枝豫章從小有梁

棟也似鄭公雙鬢垂魯直子瞻作絕島煙生樹秋江浪

拍空憑君添小艇畫我作漁翁渺風枝雨葉瘠土竹龍

蹲虎踞蒼蘚石東坡老人翰林公醉時吐出胸中墨山谷

題子瞻 飛雪洒蘆如銀箭前鴈驚起後回眄誰說與

謝元暉休道澄江淨如練山谷雪不肯低頭拾卿相又

能落筆生雲煙山谷贈生絹六幅淡墨圖伊人筆端有

造化驕駟汗血捉電光牯犢倦耕眠草下陂塘漠漠煙

雨後出水羣魚戲瀟洒細看物物有生意不比尋常能

畫者請君就此三景中揮毫添我作漁翁岸頭孤石持

竿坐白鷺同居蒲葦叢有時尋詩出遊行款段徐行山

路遠奚奴逐後背錦囊木杪斜陽鴉噪晚有時簑笠過

田間農婦農夫相往還手放鋤犁吹短笛日暮青郊黃

犢閑王孫貴人不識此此是吾儂佳絕處挂君圖畫讀

吾詩令人懶踏長安路戴石筍牛馬何人筆端有許力

捲來一片瀟湘碧摩挲老眼看不真怪見層波湧虛壁

天慶觀中雙黑龍物色雖殊妙處同能將此水畜彼龍
方知盡手有神通龍兮水兮終會遇天下蒼生待霖雨
石屏毘陵太平寺畫水

射御

貫虱列子湯問篇甘蠅古之善射者彎弓而獸伏馬下
弟子名飛衛學射於甘蠅而巧過其師紀昌又學射於
飛衛衛曰視小如大視微如著而後告我昌以蹇懸虱
於牖間南面而望之旬月之間浸大也三年之後如車
輪焉乃以燕角之弧朔蓬之幹射之貫虱之心而懸不
絕昌既盡衛之術計天下之敵已者一人而已乃謀殺
衛相遇於野二人交射中路矢鋒相觸墜於地而塵不
揚衛之矢先窮昌遺一矢既發衛以棘刺之端扞之而

無差於是二子相拜於塗請為父子

至眸子而目不睫列子仲尼篇逢蒙之弟子曰鴻起怒
其妻而怖之引烏號之弓淇衛之箭射其目矢至眸子
而目不睫矢墜地而塵不揚

三箭定天山唐薛仁貴傳時九姓衆十餘萬令驍騎數
十來挑戰仁貴發三矢殺三人於是虜氣懾皆降軍中
歌曰將軍三箭定天山壯士長歌入漢關

沒金飲羽韓詩外傳熊渠子夜行見寢石以為伏虎彎
弓而射之沒金飲羽下視之知其石也因復射之矢摧
無迹也

得於術應於響列子造父學御於泰豆氏得之於術應
之於響得之於響應之於手得之於手應之於心即不

以目視不以策驅心閑體正六轡不亂而二十四蹄所
投無差回旋進退莫不中節然後輿輪之外可使無餘
轍馬蹄之外可使無餘地

造父善御史秦紀造父以善御辛周繆王得驂耳之駟
西巡狩樂而忘歸徐偃王作亂造父爲御長驅歸周繆
王以趙城封造父

百步穿楊漢枚乘書養由基楚之善射者也去楊葉百
步百發百中楊葉之大加之百中焉可謂善矣

一發破的北史賀若弼字輔伯突厥入朝上賜之射突
厥一發中的上曰非弼無能當此乃命弼弼再拜祝曰
臣赤誠奉國當一發破的如不然發不中也弼射一發
而中上大悅顧謂突厥曰此人天賜我

投壺

郭舍人能激矢西京雜記云武帝時郭舍人善投壺以
竹爲矢不用棘也能激矢令還一矢百餘反謂之驍言
如博之豎於輦中爲驍傑也每爲武帝投壺輒賜金帛
樂賓記云主人請曰某有枉矢哨壺請以樂賓

晉與齊宴左晉侯與齊侯宴投壺穆子曰有酒如淮有
肉如坻寡君中此爲諸侯師中之齊侯舉矢曰有酒如
澠有肉如陵寡人中此與君代興亦中之

祭禮雅歌後漢祭遵在軍旅對酒設樂雅歌投壺

王弼善投壺魏畧王弼善投壺

講論才藝記投壺篇註投壺者主人與客燕講論才藝
之禮也

有餘清 杜詩投壺散帙有餘清

碁

白玉碁局 搜神記昔有人入南谷山中見一小池橫石橋遂驟馬過橋見二少年臨池奕碁置白玉碁局見騎馬者拍手負局而走

舜造圍碁 博物志曰舜造圍碁丹朱善之

碁隱語 墨客揮犀云舒王在鍾山有道士來謁因與碁輒作數語曰彼亦不敢先此亦不敢先惟其不敢先是以無所爭惟其所爭故能入於不死不生舒王笑曰此特碁隱語也

碁聖 抱朴子云夫善奕碁者世謂之碁聖故嚴子卿馬緩明有碁聖之名也

覆碁 魏志王粲觀人圍碁局壞粲為覆之不誤一道

與子爭道 晉王導與其子悅奕碁爭道導笑曰相與為瓜葛那得為爾耶

賭別墅 晉謝安傳符堅率眾百萬次淮淝謝安加征討大都督夷然無懼色命駕出山墅與兄子元圍碁賭別墅安碁劣於元是日元正便為敵手又不勝至夜還指授將帥各當其任元等既破堅有書至安方對客圍碁看書竟放床上無喜色客問之徐云小兒輩已遂破賊

西南風急 南史謝弘微與友人碁友人西南碁有死勢

復一客曰西南風急或有覆舟者友悟救之弘微怒遂投局於地

弘微謝混字

賭郡 羊元保善奕碁宋文帝亦好碁與賭郡元保戲勝

補宣城太守 南史本傳

方圓動靜 唐李泌傳元宗馳召泌既至帝方與張說觀奕因使說試其能說請賦方圓動靜泌曰願聞其畧說曰方若碁局圓若碁子動若碁生靜若碁死泌即答曰方若行義圓若用智動若騁材靜若得意說因賀帝得奇童帝大悅曰是子精神要大於身

爛柯 述異記云信安郡石室山晉時王質伐木至見數童子碁與質一物如棗核含之不覺饑視斧柯爛盡既歸無復時人

手談 世說支道林以圍碁爲手談

詩 自喜仙家日月長端居隨分信行藏無窮遠景貧中富一局閒碁靜裏忙枕存槐夏綠陰合薰風北窓涼相

持文楸間執律戒否臧機心辨黑白綱紀衆目張坐令方寸地百險生太行湖少荆璞玉爲子井文楸作枰有求惟別墅不喜得宣城跼跼飛鳶墮丁丁伐木聲破愁逢一笑無地着虧成○從他着虎口尋我鎮神頭誰悟爭先法當機與手謀○兒童爭畫紙謾學老夫狂○變態一翻覆幾微係後先並洪圍碁闔白黑生死隨機緣韓愈筭盡毫芒費盡機直饒國手亦懷疑坐中但覺超凡速悟處方驚下手遲石黑白誰分靜裏機何人會得劫移時分明有箇長生路只恐人心着處迷謝靈靜筭山川千里近閒消日月兩輪空歐陽勢迫流星轉聲乾下電遲臨軒纔一局斜日又西歌張決勝雖關勇忘危亦合憂看他終一局却白少年頭韜戰罷兩奩收黑白一

秤何處有虧盈王安石人皆稱善奕伊我獨不能試坐觀
勝敗白黑何分明運智奇復詐用心險且傾嗟哉一秤
上奚足勞經營安得百萬騎鐵甲相磨鳴西取元昊頭
獻之天子庭北入匈奴域縛戎王南行東逾滄海東射
破高麗城南趨交趾國蠻子輿櫬迎盡使四夷臣歸來
告太平誰能憑文楸兩人終日爭詔誰知坐隱妙通仙
國手那能保萬全對面機關難測度臨危一着謾爭先
餘

樗蒲

得雉得盧通鑑顏師伯爲侍郎師伯以諂佞被親任群
臣莫及多納貨賄家累千金上嘗與之樗蒲上擲得雉
自謂必勝師伯次擲得盧上失色師伯遽斂子曰幾作

盧是日師伯一輸百萬

三擲盡盧慕容寶與黃李根等樗蒲寶危坐誓之曰世
言樗蒲有神若富貴可期頻得三盧於是三擲盡盧袒
跣大叫也又見杜今夕行詩

東府大擲晉書劉毅於東府聚樗蒲大擲一判應至數
百萬餘人並黑獷以還唯劉裕及毅在後毅次擲得雉
大喜褰衣繞牀叫謂同坐曰非不能盧不事此耳裕惡
之因按五木礫預久之曰老兄試爲卿答旣而四子俱
黑其一子轉躍未定裕厲聲喝之卽成盧毅意殊不快
然素黑其面如鐵色焉

一擲百萬南史桓玄聞劉毅起兵曰毅家無儋石之儲
樗蒲一擲百萬共舉大事何謂無成

五白楚辭招魂云成臬而牟呼五白註云五白五木也
又王洙杜詩註云五白博齒也又師註杜詩云五白卽
今之骰子

臬盧杜詩今夕行袒跣不肯成臬盧趙註云臬勝也盧
勝之名也韓非子載匡倩對齊宣王語曰博者貴臬
牧猪奴戲晉陶侃勤於吏職諸叅佐或以談戲廢事乃
命取酒器蒲搏之具投于江曰樗蒲者牧猪奴戲耳

陟魚反

詩咸陽客舍一事無相與博塞爲歡娛馮陵大叫呼五
白袒跣不肯成臬盧杜行今六博爭雄好彩來金盤一擲
萬人開李白

錦繡萬花谷別集卷之二十五

錦繡萬花谷別集卷之二十六

詞曲

紫雲曲元宗謂高力士曰吾昨夜夢遊月宮月宮諸仙
娛予以上清之樂寥亮清越之音非人間所聞也吾歸
其曲妻楚動人杳杳在耳力士請名曰紫雲曲又宣室
志元宗夢仙子十輩御卿雲而下列於庭各執樂器而
奏之其度曲清越殆非人世也及樂闋有一仙子前曰
陛下知此樂乎此神仙紫雲之曲也

梨園曲明皇雜錄云天寶中上命宮中女子數百人爲
梨園弟子皆居宜春北苑上素曉音律時有馬仙期李
龜年賀懷志皆洞知律度安祿山自范陽入覲亦獻白
玉簫管數百事皆陳於梨園自是音響始不類人間其

後李龜年流廢江南每遇良辰勝景為人歌闋座上聞之者莫不掩泣罷酒有梨園法曲及霓裳曲至今尚存

玉樹後庭花南史陳張貴妃傳後主每引賓客對貴妃等遊宴則使諸貴人及女學士與狎客共賦新詩互相贈答采其尤豔麗者以為曲詞被以新聲選宮女有容色者千百數令習而歌之其曲有玉樹後庭花臨春樂等其畧云璧月夜夜滿瓊樹朝朝新大抵所歸皆美張貴妃孔貴嬪之容色

三臺曲李正文資暇集云今之催酒三臺或曰鄴中有三臺石崇游宴之地樂工以促飲又云蔡邕三日之間周歷三臺樂府以邕曉音律製此曲希其厚遺

雨淋鈴曲明皇雜錄云上初入斜谷屬淋雨涉旬於棧

道聞鈴聲與山相應上悼念貴妃因采其聲為雨淋鈴曲以寄恨焉

別鵲曲南史褚彥回嘗聚袁粲舍初秋涼夕風月甚美彥回援琴奏別鵲之曲宮商既調風神諧暢王或謝莊並在坐撫節嘆曰以無累之神合有道之器宮商暫離不可得已

樂

房中樂房中祠樂漢高祖唐山夫人所作也高祖樂楚聲故房中樂楚聲也

牛鐸諧樂晉荀勗於路逢賈人牛鐸識其聲及掌樂音韻未調乃曰得趙之牛鐸則諧矣遂下郡國悉送牛鐸果得諧者

鐸調黃鍾北史長孫紹遠為太常廣召工人好作樂器
惟黃鍾不調每恨之嘗經佛寺聞浮圖三層上鐸鳴其
音雅合宮調因取而配之方始克諧

破陣樂唐自制樂凡三大舞一曰七德舞二曰九功舞
三曰上元舞七德舞者本名秦王破陣樂太宗即位宴
會必奏之

去軍中樂唐李夷簡字易之徙帥劔南始韋臯作奉聖
樂于頔作順聖樂常奏之軍中夷簡輒廢去謂禮樂非
諸侯可擅制

詞賦

獻賦蓬萊宮杜莫相疑行憶獻三賦蓬萊宮自怪一日
聲輝赫集賢學士如堵牆觀我落筆中書堂

擲地金聲晉孫綽作天台賦辭致甚工初成以示友人
范榮期云卿試擲地當作金石聲也

洛陽紙貴晉左思字太冲欲賦三都乃詣著作郎張載
訪岷邛之事遂構思十年門庭蕃溷皆著筆紙遇得一
句即便疏之賦成張華見而嘆曰班張之流也於是豪
貴之家競相傳寫洛陽為之紙貴

雪賦謝靈運雪賦云歲將暮時既昏寒風積愁雲繁梁
王不悅遊於兔園俄而微霰零落雪下

長嘯公本朝范鎮少時嘗賦長嘯却胡騎賦及奉使高
麗虜相目曰此長嘯公也

鸚鵡賦南史文帝嘗詔群臣為鸚鵡賦袁淑文冠當時
作賦畢示謝莊及見莊賦嘆曰江東無我卿當獨步我

若無卿亦一時之傑遂隱其賦

投以梅花賦唐劉禹錫上權舍人書宋廣平之沉下僚

也蘇公味道時為繡衣直指使者廣平投以梅花賦蘇

盛稱之自是方列於聞人之目是知美賢卓犖可外文

字然猶用片言借說於先達之口席其勢而後驤首當

時矧碌碌者疇能自興

萬言不直杯水李白答王十二寒夜獨酌詩吟詩作賦

比窻裏萬言不直一杯水

雌霓連蜷南史王筠字元禮一字德柔沈約製郊居賦

搆思積時猶未都畢示筠草筠讀至雌霓反的連蜷約

撫掌欣抃曰僕嘗恐人呼為霓反次至墜石礎星及

冰懸墀而帶坻筠皆擊節稱贊約曰知音者希真奇殆

絕所以相要政在此數句耳

三都賦晉左思三都賦成時人未之重思自以其作不

謝班張恐以人廢言安定皇甫謐有高舉愚造而示之

謐稱善為其賦序張載為注魏都劉逵注吳蜀而序之

自是盛重於時

詩

一字價等連城北史魏孝文宴侍臣於清徽堂仰觀桐

葉之茂曰諸賢足敷歌詠遂令崔光讀暮春群臣應制

詩至彭城王勰詩帝為改一字曰瑠瑠猶是王之本體

勰曰詩三百一言可蔽今陛下賜刊一字足以價等連

城

風餐柳下之句杜舟中詩云風餐江柳下雨卧驛樓邊

蘇注云阻風餐柳下值雨坐篷窓句法絕妙不知誰詩也恨不見全篇與魯直讀至此遂記而疏之疑子美亦法此二句而作也其詩二句在晉文類中

對月偕星杜春陵行兩章對秋月一字偕華星

詩家標準杜贈鄭十八賁詩示我百篇文詩家一標準

書篋留金石聲杜記異詩序云蘇大侍御旅於江側肩

輿江浦忽訪老夫舟楫而已茶酒內余請誦近詩肯吟數首才力素壯詞句動人接對明日憶其湧思雷出書篋几杖之外殷殷留金石聲

黃初詩杜記異詩再聞誦新作突過黃初詩趙註云文帝為魏太子七十子從之游皆能詩如謝靈運江文通皆擬其作黃初文帝即位年號也

一字亦不能到歐公詩話云初陳舍人從易偶得杜集舊本文多脫誤至送蔡都尉詩身輕一鳥其下脫一字陳公與數客各用一字補之或云疾或云落或云下莫能定後得一善本乃是過字陳公歎服以為雖一字諸君亦不能到

相葉題詩杜詩石欄斜點筆桐葉坐題詩蘇註云黃藏好詩酒幽居得句家無紙即摘桐葉題之句法膾炙人口好事者常以毫楮遺之

子美得詩人體司馬公曰近世詩人唯子美最得詩人之體如國破山河在城春草木深感時花濺淚恨別鳥驚心山河在明無餘物矣草木深明無人矣花鳥平時可娛之物見之而泣聞之而悲則時可知矣他皆類此

不可徧舉

詩瘦崔浩愛吟詠一日病起友人戲之曰非子病如此乃子苦吟詩瘦也杜詩云知君苦思緣詩瘦

腹中國子監少游曰細味工部詩皆拾古人句語綴補作詩平穩妥帖若神施鬼設腹中幾個國子監耶杜詩蘇註

安排作狀元宰相湘山野錄云王沂公曾布衣時以所

業贄呂文穆公蒙正卷有梅花句云雪中未問和羹事且向百花頭上開文穆曰此生次第已安排作狀元宰相矣後皆然

賜銀鍾唐杜淹秦王引為文學館學士常侍宴賦詩尤工賜銀鍾

詩人冠冕唐席豫字建侯帝常登朝元閣賦詩群臣屬

和帝以豫最工詔曰詩人之冠冕也

父子侍宴為詩北史崔陵子瞻字彥通魏孝靜帝以人

日登雲龍門與其父陵俱侍宴為詩詔問邢邵等曰今瞻此詩何如其父咸曰陵博雅弘麗瞻氣調清新並詩人之冠冕宴罷共嗟賞之云今日之宴併為崔瞻父子

兩牛腰李白贈王歷陽詩書禿千兔毫詩裁兩牛腰

大曆十才子唐盧綸字允言德宗表其才召見禁中帝有所作輒使賡和綸與吉中孚韓維乎萌反錢起司空曙

苗發崔峒耿湜干非反夏侯審李端皆能詩齊名號大曆十才子

亭臯木葉下南史柳惲字文暢少工篇什為詩云亭臯

木葉下龍首秋雲飛琅琊王融見而嗟賞因書齋壁及

所執白團扇武帝與宴必詔憚賦詩嘗和武帝登景陽樓篇云太液滄波起長楊高樹秋翠華承漢遠彫輦逐風游深見賞美當時咸共稱傳武帝梁武帝也

石鼎聯句韓文衡山道士軒轅彌明與劉師服進士相識將過太白知師服在京夜抵其居宿有校書郎侯喜新有詩聲夜與劉詩彌明在側貌極醜喜視之若無人彌明忽軒衣張眉指鑪中石鼎謂喜曰子云能詩與我賦此乎云云劉聞此說大喜援筆題其首次傳於喜道士哂然笑曰子詩如此而已乎謂劉曰吾不解世俗書子爲我書因高吟曰龍頭縮困蠢豕腹漲彭亨云云天且明道士起出門卽出到門覓無有也

冥默咸池音韓文孟生江海客古貌又古心云云作詩

三百首冥默咸池音騎驢到京國欲和薰風琴

黑雲壓城幽閑鼓吹云李賀以歌詩謁愈愈送客出歸極困解帶旋讀之首篇鴈門太守行黑雲壓城城欲摧甲光向日金魚開却插笏急命還之觀韓文韓

栢梁體栢梁詩體起漢武帝栢臺成命燕詔公卿二千石能七言詩者居上座於是成此詩而後世宋孝武帝華林曲小燕梁武帝清暑殿燕皆倣之號曰栢梁體其實後世之聯句詩也其詩曰皇帝曰日月星辰和四時梁王曰駮駕駟馬從梁來大司馬曰郡國士馬羽林材丞相曰總領天下誠難治大將軍曰和撫四夷不易哉御史曰刀筆之吏臣執之太常曰撞撞擊鼓聲中詩宗正曰宗室廣大日益滋衛尉曰周衛交戟禁不時光祿

勲曰總領從官栢梁臺廷尉曰平理請讞決嫌疑太僕
曰循飲輿馬待駕來大鴻臚曰郡國吏功差次之少府
曰乘輿御典主治之大司農曰陳粟萬石揚以箕執金
吾曰闕左馮翊曰三輔盜賊天下左右扶風曰盜阻南
山爲民災京兆尹曰外家公主不可治詹事曰欄房更
率領其財典屬國曰蠻夷朝賀常會期大匠曰柱枅樽
櫨相支持大官令曰枇杷橘栗桃李梅上林令曰走狗
逐兔張置罟郭舍人曰齧妃女唇甘如飴東方朔曰迫
窘詰屈幾窮哉此栢梁體也

樂府體武帝時因定郊祀乃立樂府遂令取齊楚趙魏
舊聲詞入之於樂府令歌之因謂樂府詞如文選所載
飲馬長城窟行等是也

回文體齊王融作回文詩後作者如梁簡文帝和膠東
王後園周庾和回文詩甚多號曰回文體王融後園詩
曰斜峯迭徑曲聳石帶山連花餘拂戲馬樹密隱鳴蟬
建除體宋鮑照始作建除詩建除者陰陽有建除滿平
定執破危成收開閉十二日今此詩每韻首句第一字
用一字自建字爲首閉字爲卒照所作云建旗出燉煌
西討屬國羗除去徒與騎戰車羅萬箱滿山又填谷投
鞍合營墻平原亘千里旗鼓轉相望定含後未休候騎
前勅裝執戈無暫傾彎弧不解張破滅西零國生虜郅
支王危亂悉平蕩萬里置關梁成軍入玉門士女獻壺
漿收功在一時歷世荷餘光開壤襲朱紱左右佩金章
閉帷草太玄茲事殆愚狂

數詩體宋鮑照以一至十作數詩其後齊虞羲及梁范雲並倣之照詩曰一身仕關西家族滿山東二年從車駕齋祭甘泉宮三朝國慶畢休沐還舊邦四牡躍長路輕蓋若飛鴻五侯相餞送高會集新豐六樂陳廣座祖帳揚春風七盤起長袖庭下列歌鐘八珎盈彫俎綺殺紛錯重九族咸瞻遲賓友仰徽容十載學無就善官一朝通

詩各有所得臨川云詩各有所得清水出芙蓉天然去彫飾此李白所得也或看翡翠蘭茗上未掣鯨鯢碧海

中此杜甫所得也橫空盤硬語妥帖力排冪音傲此韓愈所得也

苦吟非草草妙趣若平平李杜詩壇上為君題姓名砥

屏讀嚴

冷淡篇章遇賞難杜陵清瘦孟郊寒黃金作紙

珠排字未必時人不喜看戴石詩老相過髮影星吟竟

未減昔年清分明不着人間語盡把梅花巧琢成王幼學贈

戴式

名賢著述

論衡

袁山松後漢書曰王克作論衡中土未有傳者蔡

邕入吳始得之常祕玩以為談助王朗為會稽太守又得其書及還許下時人稱其才進或曰不見異人當得異書問之果以論衡之益由是遂傳焉又抱朴子曰時人嫌蔡邕得異書或搜求其帳中隱處果得論衡抱數卷持去邕丁寧之曰唯我與尔共之勿廣也

雋永 漢蒯通論戰國時說士權變亦自序其說凡八十一首號曰雋永顏注云雋字允反肥肉也永長也言所論甘美而義深長也

通典 唐杜佑字君卿資性嗜學雖貴猶夜分讀書先是劉秩摭百家俾周六官法為政典三十五篇房瑄稱才過劉向佑以為未盡因廣其闕參益新禮為二百篇號通典奏之優詔嘉美儒者服其書約而詳

戰守論 唐杜牧原十六衛作戰守論俄而澤潞平畧如牧策

三足記 唐盧景亮字長晦有經國志嘗謂人君足食足兵而又得士天下可為也乃剡治道之要著書上下篇號三足記

反騷廣騷 漢揚雄傳雄字子雲恠屈原文過相如至不容作離騷自投江而死悲其文讀之未嘗不流涕也迺作書徃徃披離騷而反之自岷山投諸江流以弔屈原名曰反離騷又作重一篇名曰廣騷又旁惜誦以下至懷沙一卷名曰畔牢愁

五臣註文選 唐呂向以李善釋文選為繁釀與呂延濟劉良張銑李周翰等更為詁解時號五臣註

寶章集 唐王綝字方慶后嘗就求義之書方慶奏十世從祖義之書四十餘番太宗求之先臣悉上送今所存唯一軸并上十一世祖導十世祖洽九世祖珣八世祖曇首七世祖僧綽六世祖仲寶五世祖騫高祖褒并九世從祖獻之等凡二十八人書共十篇后徧示羣臣詔

崔融序其代閎號寶章集

皇符篇唐李嶠字巨山武后時汜水獲瑞石嶠上皇符一篇為世譏薄

河西人物志唐趙彥昭父武孟力學淹該書記為侍御史著河西人物志十篇

桂苑叢珠唐曹憲傳古文亡絕至憲復興煬帝令與諸儒撰桂苑叢珠規正文字

宋頌慶曆頌石守道詩序云介字守道徂徠山人也文章學術一時宗師呼為徂徠先生著宋頌十篇識者以為倚那清廟無以加也慶曆天下賢士大夫畢用于朝先生作慶曆聖德頌

酉陽書唐段成式博學強記多奇篇祕籍著酉陽書數

十篇

書簡

投石頭城水中晉殷羨字洪喬為豫章太守都下人士因其致書者百餘函行次石頭城皆投之水中曰沉者自沉浮者自浮殷洪喬不為致書郵其資性介立如此

一月一束杜暮秋遣興詩又客多枉友朋書素書一月凡一束蘇註云王价避居遠郊一月之中得親知書僅成一束但虛詞寒溫而已空煩眼力使人厭接又倦回

答

家書抵萬金王筠父在沙場得家書抵萬金顏師古曰王筠意思真堪笑却把家書抵萬金

鯉魚中素書樂府飲馬長城窟詩客從遠方來遺我雙

鯉魚呼童烹鯉魚中有尺素書長跪讀素書書中竟何
如上有加餐食下有長相憶

願寄雙飛燕 文選李都尉陵從軍詩而我在萬里結友
不相見袖中有短書願寄雙飛燕

相思秋復春 李白贈漢陽輔錄事詩云漢口雙魚白錦
鱗令傳尺素報情人其中字數無多少祇是相思秋復
春

南鴈北魚 杜鴈韋韶州見寄詩雖無南過鴈看取北來
魚

長鬚致鯉 韓寄盧仝詩先生有意許降臨更遣長鬚致
雙鯉

傳書鴿 開元天寶遺事云張九齡家養群鴿每與親知

書繫鴿足上飛往投之目為飛奴

又續模楷 魏胡昭善史書與鍾繇邯鄲淳衛覲韋誕並
有名尺牘之迹動為模楷焉

黃耳傳書 晉陸機有俊犬名曰黃耳甚愛之既寓京師
久無家問笑語犬曰我家絕無書信汝能齎書取消息
否犬搖尾作聲機乃為書以筒盛之而繫其頸犬尋路
南走至其家得報還洛後以為常

劉公一紙 晉劉弘字和季領荊州每有興廢手書守相
丁寧款密人皆感悅爭赴之咸曰得劉公一紙書賢於
十部從事

錦石書堂花谷別集卷之二十六

